

四庫全書

子部

欽定四庫全書

子部

冊府元龜卷三百四十三至
六

詳校官中書臣羅錦森

侍讀臣孫球覆勘

總校官庶吉士臣何思鈞

校對官助教臣蔡鎮

謄錄監生臣段文新

欽定四庫全書

冊府元龜卷三百四十三

宋 王欽若等 撰

將帥部

佐命第四

吳張昭字子布彭城人漢末大亂徐方士民多避難揚
土昭皆南渡江孫策創業命昭為長史撫軍中郎將升
堂拜母如比肩之舊文武之事一以委昭後漢獻帝建
安五年策臨亡以弟權託昭昭率羣僚立而輔之

策謂昭曰

若仲謀不任事者君便自取之正復不克捷緩步西歸亦無所慮仲謀權字也

權哭未及息昭

謂權曰孝廉此寧哭時耶且周公立法而伯禽不師非欲違父時不得行也夫為人後者貴能負荷先軌克昌堂構以成勲業也方今天下鼎沸羣盜滿山孝廉何得寢伏哀戚肆匹夫之情哉乃身自扶權上馬陳兵而出然後衆心知有所歸權乃上表漢室下移屬城中外將校各令奉職昭復為權長史權為吳王拜昭綏遠將軍封繇奉侯權既稱尊號昭以老病上還官位及所統領

更拜輔吳將軍班亞三司改封婁侯食邑萬戶

周瑜字公瑾廬江舒人初孫堅興義兵討董卓徙家於

舒堅子策與瑜同年獨相友善瑜推道南大宅以舍策

升堂拜母有無通共收合士大夫江淮間人咸向之

江表

傳曰堅為朱鳥所表為佐軍留家于壽春策年十餘歲已交結知名聲譽發間有周瑜者與策同年亦英邁夙成間策聲問自舒來造焉便雅結分好義同斷金勸策徙居舒策從之瑜從父尚為丹陽

太守瑜往省之會策將東渡到歷陽馳書報瑜瑜將兵迎策策大喜曰吾得卿諧也遂從攻橫江當利皆拔之

乃渡擊秣陵破笮融薛禮轉下湖孰江乘進入曲阿劉
繇奔走而策之衆已數萬矣因謂瑜曰吾以此衆取吳
會平山越已足卿還鎮丹陽瑜還頃之袁術遣從弟胤
代尚為太守而瑜與尚皆還壽春術欲以瑜為將瑜觀
術終無所成故求為居巢長欲假塗東歸術聽之遂自
居巢還吳是歲漢獻帝建安三年也策親自迎瑜授建
威中即將即與兵二千人騎五十匹頃之策欲取荊州
以瑜為中護軍領江夏太守從攻皖拔之復進尋陽破

劉勲討江夏還定豫章廬陵留鎮巴丘會策薨權統軍
瑜將兵赴喪遂留吳以中護軍與長史張昭共掌衆事
十一年督孫瑜等討麻保二屯梟其渠帥囚俘萬餘口
還備官亭江夏太守黃祖遣將鄧龍將兵數千人入柴
桑瑜追討擊生虜龍送吳曹公既破荊州得其水軍船
步兵數十萬議者皆欲迎之瑜請精兵三萬進住夏口
遇之遂敗曹公于赤壁拜偏將軍領南郡太守以下雋
漢昌劉陽丹陵為奉邑屯據江陵卒年三十六

魯肅字子敬臨淮東城人與居巢長周瑜相親結瑜之東渡因與同行留家曲阿會祖母亡還葬東城劉子揚與肅友善遺肅書曰方今天下豪傑竝起吾子姿才尤宜今日急還迎老母無事滯於東城近鄭寶者今在巢湖擁衆萬餘處地肥饒廬江間人多依就之况吾徒乎觀其形勢又可博集時不可失足下速之肅答然其計葬畢還曲阿欲北行會瑜已徙肅母到吳肅具以狀語瑜時孫策已薨權尚住吳瑜謂肅曰昔馬援答光武

云當今之世非但君擇臣臣亦擇君今主人親賢貴士
納竒錄異且吾聞先哲祕論承運代劉氏者必興於東
南推步事勢當其厯數終構帝基以協天符是烈士攀
龍附鳳馳騫之秋吾方達此足下不須以子揚之言介
意也肅從其言瑜因薦肅才宜佐時當廣求其比以成
功業不可令去也權即見肅與語甚悅之衆賓罷退肅
亦辭出乃獨引還合榻對飲因密議曰今漢室傾危四方
雲擾孤承父兄遺業思有桓文之功君既惠顧何以佐

之肅對曰昔高帝區區欲尊事義帝而不獲者以項羽
為害也今之曹操猶昔項羽將軍何繇得為桓文乎肅
竊料之漢室不可復興曹操不可卒除為將軍計唯有
鼎足江東以觀天下之釁規模如此亦自無嫌何者北
方誠多務也因其多務勦除黃祖進伐劉表竟長江所
極據而有之然後建號帝王以圖天下此高帝之業也
權曰今盡力一方冀以輔漢耳此言非所及也會曹公
破荊州將水軍船步兵數十萬水陸俱下權與諸將議

皆勸迎之肅曰將軍迎曹操欲安所歸顧早定大計莫
用衆人之議遂拒曹公任周瑜以行事以肅為贊軍校
尉助畫方略曹公破走

赤壁之
敗也

瑜病困上疏乞以肅代

即拜肅奮武校尉代瑜領兵瑜士衆四千餘人奉邑四
縣皆屬焉肅初住江陵後下屯陸口拜漢昌太守偏將
軍從權破皖城轉橫江將軍後漢獻帝建安二十二年
卒後權稱尊號臨壇顧謂公卿曰昔魯子敬嘗道此可
謂明於事勢矣

呂蒙字子明汝南富陂人少南渡依姊夫鄧當當為孫策將數討山越蒙年十五六竊隨當擊賊策召見奇之引置左右數歲鄧當死張昭薦蒙代當拜別部司馬策薨從權討丹陽所向有功拜平北都尉領廣德長從征黃祖以功為橫野中郎將與周瑜程普等西破曹公於烏林圍曹仁於南郡仁退走遂據南郡撫定荊州還拜偏將軍領尋陽令後從權拒曹公於濡須數進奇計又勸權夾水口立塢所以備禦甚精曹公不能下而退蒙

還尋陽未期而廬陵賊起令蒙討之誅其首惡時蜀先
主令關侯鎮守專有荆土權命蒙西取長沙零桂三郡
蒙移書二郡望風歸服惟零陵太守郝普城守不降會
蜀先主請盟吳割湘水以零陵還之以尋陽陽新為蒙
奉邑後曹公又大出濡須權以蒙為督拒破之曹公引
退拜蒙左護軍虎威將軍又拜漢昌太守食下雋瀏陽
漢昌丹陵與關公分土接境羽以兵圍曹仁於樊留傅
士仁守公安蒙至南郡太守糜芳與士仁皆降遂入據

城盡得公及將士家屬皆撫慰之公還吏士無關心會
權至衆皆委公而降荊州遂定以蒙為南郡太守封孱
陵侯以疾卒

賀齊字公苗會稽山陰人後漢獻帝建安元年孫策臨
郡察齊孝廉領永寧長代韓晏領南郡都尉八年建安
漢興南平亂齊進兵建安立都尉府遷新都太守加偏
將軍十八年豫章東部民彭材李玉王海等起為賊亂
衆萬餘人齊討平之遷奮武將軍二十一年都陽民尤

突受曹公印綬化民為賊陵陽始安涇縣皆與突相應
齊與陸遜討破突斬首數千餘黨震服丹陽三縣皆降
料得精兵八千人拜安東將軍封山陰侯出鎮江上督
扶州以上至皖黃武初魏以曹休來伐齊以道遠後至
因住新市為拒休等憚之引軍還遷後將軍領徐州牧
初晉宗為戲口將以衆叛如魏還為蕪春太守圖襲安
樂取其保質權以為恥忿因軍初罷六月盛夏出其不
意詔齊督糜芳鮮于丹等襲蕪春遂生虜宗

全琮字子璜吳郡錢塘人父柔為會稽東部都尉孫策至吳柔舉兵先附策表柔為丹陽都尉後為權車騎長史權又以琮為奮威校尉授兵數千人使討山越因開幕召得精兵萬餘人出屯牛渚稍遷偏將軍蜀將關羽圍樊襄陽琮上疏陳羽可討之計及禽羽權置酒公安顧琮曰君前陳此今日之捷抑亦君之功也封陽華亭侯黃武元年魏以舟軍大出洞口權使呂範督諸將拒之軍營相望敵數以輕船鈔擊琮嘗帶甲仗兵伺候不休

頃之敵數千人出江中琮擊破之梟其將軍尹盧遷琮

綏南將軍

一云魏將曹休使臧霸以輕舟五百敢死萬人襲攻徐陵燒攻城車殺畧數十人將軍全

琮徐臧追斬魏將尹盧殺獲數百

進封錢塘侯七年權至皖與輔國將

軍陸遜擊曹休破之於石亭黃龍元年遷衛將軍左護軍徐州牧尚公主累加右大司馬左軍師

程普字德謀右北平土垠人初為郡吏從孫堅征伐討黃巾於宛鄧破董卓於陽人攻城野戰身被創夷堅薨復隨孫策在淮南從攻廬江拔之還俱東渡策到橫江

當利破張英于麋等轉下秣陵湖熟句容曲阿普皆有
功增兵二千騎五十匹進破烏程石木波門陵傳餘杭
普功為多策入會稽以普為吳郡都尉治錢塘後徙丹
陽都尉居石城復討宣城涇安吳陵陽春穀諸賊皆破
之策嘗攻祖郎大為所圍普與一騎共蔽扞策驅馬疾
呼以矛突賊賊披策因隨出後拜盪寇中郎將領零陵
太守從討劉勲於尋陽進攻黃祖於沙羨還鎮石城策
薨與張昭等共輔孫權遂周旋三郡平討不服又從征

江夏還過豫章別討樂安樂安平定代太史慈備海昏
與周瑜為左右督破曹公於烏林又進攻南郡走曹仁
拜裨將軍領江夏太守治沙羨食四縣周瑜卒代領南
郡太守權分荊州與蜀普還領江夏遷盪寇將軍卒

諸葛瑾字子瑜瑯邪陽都人漢末避亂江東值孫策卒
權姊婿曲阿弘咨見而異之薦之於權與魯肅等竝見
賓待後為權長史轉中司馬從討關羽封宣城侯以綏
南將軍代呂蒙領南郡太守黃武元年遷左將軍督公

安假節封宛陵侯魏將曹真夏侯尚等圍朱然等於江陵又分據中州瑾以大兵為之救援瑾性弘緩推道理任計畫無應卒倚伏之術兵久不解權以此望之及春水生潘璋等作水城於上流瑾進攻浮橋真等退走權稱尊號拜瑾大將軍左都護領豫州牧

黃蓋字公覆零陵泉陵人初辟公府孫堅舉義兵蓋從之破南山賊北走董卓拜別部司馬堅薨蓋隨策及權擐甲周旋蹈刃屠城諸山越不賓有寇難之縣輒用蓋

為守長後漢獻帝建安中隨周瑜拒曹公於赤壁以功拜武鋒中郎將武陵蠻夷反亂攻城邑乃以蓋領太守寇亂盡平後長沙益陽縣為山賊所攻蓋又平討加偏將軍病卒

韓當字義公遼西令支人以便弓馬有膂力幸於孫堅從征伐周旋數犯危難陷敵擒虜為別部司馬及孫策東渡從討三郡遷先登校尉授兵二千騎五十匹從征劉勲破黃祖還討鄱陽領樂安長山越畏服後以中郎

將與周瑜等拒破曹公又與呂蒙襲取南郡遷偏將軍
永昌太守宜都之役與陸遜朱然等共攻蜀軍於涿鄉
大破之徙威烈將軍封都亭侯曹真攻南郡當保東南
在外為帥厲將士同心固守又敬重督司奉遵法令權
善之黃武二年封石城侯遷昭武將軍領冠軍太守後
又加都督之號將敢死及解煩兵萬人討丹陽賊破之
會病卒

蔣欽字公奕九江壽春人孫策拜別部司馬授兵與策

周旋平定三郡又從定豫章累遷西部都尉會稽治賊
呂合秦狼等為亂欽將兵討擊遂擒合狼五縣平定徙
討越中郎將賀齊討黜賊欽督萬兵與齊并力黜賊
平定從征合肥魏將張遼襲權於津北欽力戰有功遷
盪寇將軍領濡須督權征蜀欽督水軍還道病卒

周泰字幼平九江下蔡人初隨孫策為左右數戰有功
策入會稽署別部司馬權愛其為人請以自給權住宣
城山賊數千人卒至權始得上馬而賊鋒刃已交於左

右或斫中馬鞍衆莫能自定惟秦奮擊騰身衛權是日無
秦權幾危殆策深德之補春穀長後從攻皖討江夏皆
有功後與周瑜程普拒曹公於赤壁攻曹仁於南郡荆
州平定將兵屯岑曹公出濡須秦復赴擊拜平虜將軍
後權破關侯欲進圖蜀拜秦漢中太守奮威將軍封陵
陽侯

董襲字元代會稽餘姚人孫策入郡襲迎於高遷亭策
見而偉之署門下賊曹時山陰宿賊黃龍羅周勃聚黨

數千人策自出討襲身斬羅勃首還拜別部司馬授兵
數千遷揚武都尉從策攻皖又討劉勲於尋陽伐黃祖
於江夏策薨權統事鄱陽賊彭虎等衆數千人襲
與凌統步騭蔣欽等各別分討襲所向輒破旬日盡平
拜威越校尉遷偏將軍後漢獻帝建安十三年權討黃
祖襲與凌統俱為前部破斬之曹公出濡須襲從權赴
之使襲督五樓船夜暴風船敗死

甘寧字興霸巴郡臨江人初依劉表因居南陽不見進

用後轉託黃祖又以凡人畜之於是歸吳周瑜呂蒙竝
共薦達孫權加異同於舊臣寧陳計破黃祖權遂西果
擒祖盡獲其士衆乃授寧兵屯當口後隨周瑜拒破曹
公於烏林攻曹仁於南郡又隨魯肅鎮益陽拒闕公以
功拜西陵太守從攻皖為外城督破獲朱光拜折衝將
軍曹公出濡須寧為前部督受勅出斫敵敵驚動遂退
凌統字公績吳郡餘杭人父操從孫策征伐常冠軍履
鋒及權統事從討江夏中流矢死統年十五左右多稱

述者權亦以操死國事拜統別部司馬行破賊都尉使
攝父兵後從破山賊權破保屯先還餘麻屯萬人統與
督張異等留攻圍之統身當矢石所攻一面應時拔壞
諸將乘勝遂大破之後權復征江夏統為前鋒先搏其城
於是大獲拜承烈都尉與周瑜等拒破曹公於烏林遂
攻曹仁遷為校尉又從破皖拜盪寇中郎將領沛相與
呂蒙等西取三郡反自益陽從往合肥為右部督拜偏
將軍卒

徐盛字文嚮瑯邪莒人客於吳為孫權別部司馬授兵
五百人守柴桑拒黃祖以功遷校尉中郎將督校兵曹
公出濡須從權禦之魏使邢貞拜權為吳王權出都亭
候貞貞有驕色張昭既怒而盛忿憤顧謂同列曰盛等
不能奮身出命為國家并許雒吞巴蜀而令吾君與貞
盟不亦辱乎因涕泣橫流貞聞之謂其旅曰江東將相
如此非久下人者也後遷建武將軍封都亭侯領廬江
太守賜臨城縣為奉邑蜀先主次西陵盛攻取諸屯所

向有功曹休出洞口盛與呂範全琮渡江拒守以少禦多敵不能克各引軍退遷安東將軍封蕪湖侯

潘璋字文珪東郡發千人孫權為陽羨長始往隨權因使召募得百餘人遂以為將討山賊有功署別部司馬累遷武猛校尉偏將軍遂領百校屯半州權征關公璋與朱然斷公走道至臨沮往夾口璋部下司馬馬忠禽公并公子平都督趙累等權即分宜都至秭歸二縣為固陵郡拜璋為太守振威將軍封溧陽侯甘寧卒又并

其軍蜀先主出夷陵璋與陸遜并力拒之以功拜平北將軍襄陽太守權稱尊號拜右將軍

朱治字君理丹陽故鄣人州辟從事隨孫堅征伐拜司馬從討長沙零桂等三郡賊周朝蘇馬等有功堅表治行都尉從破董卓於陽人會堅薨治扶翼策依就袁術後知術德政不立乃勸策還江東時太傅馬日磾在壽春辟治為掾遷吳郡都尉策為袁術攻廬江治使人於曲陽迎太妃及權兄弟策薨治與張昭等共尊奉權後

漢獻帝建安七年權表治為九真太守行扶義將軍割
婁繇拳無錫毗陵為奉邑置長史征討夷越佐定東南
禽截黃巾餘類陳敗萬秉等黃武元年封毗陵侯二年
拜安國將軍金印紫綬徙封故鄣

朱然字義封治妙子本姓施氏初治未有子然年十
三乃啓策乞以為嗣然嘗與權同學書至權統事累遷
山陰令臨川太守授兵二千人討平山賊曹公出濡須
然備大塢及三關屯拜偏將軍漢獻帝建安二十四

年從擊蜀將別與潘璋到臨沮有功遷昭武將軍封西
安鄉侯代呂蒙鎮江陵黃武元年蜀先主攻宜都然督
五千人與陸遜并力拒之然別攻破其前鋒斷其後道
遂破走之拜征北將軍封永安侯魏遣曹真夏侯尚張
郃等攻江陵起土山鑿地道立樓櫓臨城弓矢雨注凡
六月不能克乃徹攻退還繇是然名震於敵國改封當
陽侯黃龍元年拜車騎將軍領兗州牧

呂範字子衡汝南細陽人避亂富春孫策見而異之範

遂自委質將私客百人歸策從策攻廬江還俱東渡到
橫江當利破張英於麋下小丹陽湖熟領湖熟相策定
秣陵曲阿收笮融劉繇餘眾增範兵二千騎五十匹後
領宛陵令討破丹陽賊還吳遷都督從攻祖郎於陵陽
太史慈於勇里七縣平定拜征虜中郎將曹公至赤壁
與周瑜等俱拒破之拜裨將軍領彭澤太守遷建威將
軍封宛陵侯領丹陽太守治建業督扶州以下至海曹
休領張遼臧霸等來伐範督徐盛全琮孫韶等以舟師

拒休等於洞口遷前將軍封南昌侯黃武七年拜大司馬印綬未下疾卒

朱桓字休穆吳人孫權為將軍桓給事幕府累遷盪寇校尉授兵二千人使部伍吳會二郡鳩合遺散期年之間得萬餘人後丹陽鄱陽山賊蜂起攻沒城郭殺畧長吏處處屯聚桓督領諸將周旋赴討應皆平定稍遷裨將軍代周泰為濡須督黃武元年魏使大司馬曹仁步騎數萬向濡須桓拒破之梟其將常雕生虜王雙送武

昌以功封嘉興侯黃龍元年拜前將軍領青州牧

是儀字子羽北海營陵人

本姓氏郡相孔融嘲儀言氏字民無上因改馬避亂

會稽孫權承攝大業優文徵儀專典機密呂蒙圖襲關羽儀善其計從討羽拜忠義校尉既定荊州拜裨將軍封都亭侯遷侍中黃武中遣儀之皖就將軍劉邵欲誘致曹休休到大破之遷偏將軍進封都鄉侯

胡綜字偉則汝南固始人少孤將母避難江東孫策領會稽太守綜年十四爲門下循行策薨權爲討虜將軍

以綜爲金曹從事從討黃祖拜鄂長蜀先主下白帝權
以見兵少使綜料諸縣得六千人立解煩兩部綜領右
部督吳將晉宗叛歸魏爲蘄春太守去江數百里數爲
寇害權使綜與賀齊輕行掩襲生虜得宗加建武中郎
將權爲吳王封綜爲亭侯及都建業以綜爲侍中兼領
軍進封鄉侯

呂岱字定公廣陵海陵人爲郡縣吏避亂南渡會孫權
統事岱詣幕府累遷餘姚長召募精健得千餘人會稽

東冶五縣賊呂合秦狼等為亂權以岱為督軍校尉與將軍蔣欽等將兵討之遂禽合狼五縣平定拜昭信中郎將後漢獻帝建安二十年督孫茂等十將取長沙三郡又安成攸永新茶陵四縣吏共入陰山城合眾拒岱攻圍即降三郡克定權留岱鎮長沙安成長吳碣及中郎將袁龍等首尾關羽復為反亂碣據攸縣龍在醴陵權遣橫江將軍魯肅攻攸縣碣突走岱攻醴陵遂擒斬龍遷廬陵郡太守時鬱林夷賊攻圍郡縣岱討破之是

時桂陽賊王金合衆於南海界上首亂為害權又詔岱討之生縛金傳送詣都斬首獲生凡萬餘人遷安南將軍岱既定交州復進討九真斬獲以萬數又遣從事南宣國化暨徼外扶南林邑棠明諸王各遣使奉貢權嘉其功進拜鎮南將軍

張紘字子綱廣陵人避難江東孫策創業遂委質焉表為正議校尉與張昭並與參謀嘗令一人居守一人從征討紘從討丹陽策身臨行陣紘諫曰夫主將乃籌謀

之所自出三軍之所係命不宜輕脫自敵小寇願麾下
重天授之姿副四海之望無令國內上下危懼後漢獻
帝建安四年策遣紘奉章至許宮曹公爲策薨欲因喪
伐吳紘諫以爲乘人之喪既非古義若其不克成讎棄
好不如因而厚之曹公從其言即表權爲討虜將軍領
會稽太守以紘爲會稽東部校尉後權以紘爲長史從
征合肥合肥城不拔紘進計曰古之圍城開其一面以
疑衆心今圍之甚密攻之又急誠懼并命戮力死戰之

寇固難卒拔及救未至可小寬之以觀其變議者不同會救騎至數至圍下馳驅挑戰權率輕騎將往突敵紘諫曰夫兵者凶器戰者危事今麾下恃壯盛之氣忽彊暴之虜三軍之衆莫不寒心雖斬將搴旗威震敵場此乃偏將之任非主將之宜也願抑賁育之勇懷霸王之計權納紘言而止初權於羣臣多呼其字唯張昭曰張公紘曰張東部

臣欽若等曰自晉宣帝至武帝四世專政乃受魏禪不以干戈創業故無將帥

佐命元帝渡江佐命唯王導已入宰輔門餘皆西晉舊臣故亦無將帥佐命

駱統會稽烏傷人也孫權以將軍領會稽太守統年二十試為烏程相民戶過萬咸嘆其會理權嘉之召為功曹行騎都尉統志在補察苟所聞見夕不待旦常勸權以尊賢接士勤求損益享賜之日可人人別進問其燥濕加以密意誘諭使言察其志趣令皆感恩戴義懷欲報之心權納用焉出為建中郎將領武射吏三千人及凌統死復領其兵是時徵役繁重以疫癘民戶損耗統上疏權感統言深加意焉以隨陸遜破蜀軍於宜都

遷偏將軍黃武初曹仁攻濡須使別將常雕等襲中洲
統與嚴圭共拒破之封新陽亭侯

冊府元龜卷三百四十三

欽定四庫全書

冊府元龜卷三百四十四 宋 王欽若等 撰

將帥部

佐命第五

宋朱齡石初為高祖參軍盧循至石頭齡石領中軍選
敢死之士數千人上南岸高祖遣齡石領鮮卑步稍過
淮擊之齡石率厲將士皆殊死戰殺數百人賊乃退齡
石既有武幹又練吏職高祖甚親委之盧循平以為寧

遠將軍寧蠻護軍西陽太守晉安帝義熙八年高祖西
伐劉毅齡石從至江陵九年為伐蜀元帥蜀平進號將
軍封豐城縣侯十二年北伐為左將軍十四年與桂陽
公義真為佛佛所殺

朱超石初歸高祖為徐州主簿累遷中兵叅軍寧朔將
軍沛郡太守西伐劉毅高祖使超石率步騎出江陵未
至而毅平及討司馬休之遣冠軍將軍檀道濟及超石
步軍出大薄魯宗之聞超石且至自率軍攻之未戰而

江陵平晉安帝義熙十二年北伐超石為前鋒大軍進克蒲坂以超石為河東太守及高祖自長安來除中書侍郎封興平縣五等侯

檀韶字令孫世居京口初辟本州從事西曹主簿輔國司馬高祖建義韶及弟檀道濟等從平京城行叅高祖建武將軍事都邑既平為鎮軍將軍加寧遠將軍東海太守進號建武將軍遷龍驤將軍秦郡太守北陳留內史以平桓玄功封巴丘縣侯食邑五百戶復叅車騎將

軍事加龍驤將軍遷騎將中軍諮議叅軍加寧朔將軍
從征廣固率向彌胡蕃等五十人攻臨朐城克之及圍
廣固慕容超夜燒樓當韶圍分降號橫野將軍城陷之
日韶率先登領北瑯邪太守進號寧朔將軍瑯邪
內史從討盧循於左里又有戰功并論廣固功更封宜
陽縣侯食邑七百戶降先封一等為伯減戶之半二百
五十戶賜次子臻坐六門內乘輿白衣領職晉安帝義
熙七年號輔國將軍八年丁母憂起為冠軍將軍明年

復為瑯邪內史淮安太守將軍如故鎮姑熟尋進號左將軍領本州大中正十二年遷督江州豫州之西陽新蔡二郡諸軍事江州刺史將軍如故有罪免官高祖受命以佐命功增八百戶并前千五百戶

檀道濟韶之弟也高祖創義道濟從入京城叅武帝建置軍事西討平魯山禽桓振累以義勲封吳興縣五等侯盧循寇逆羣盜互起以道濟為揚武將軍天門太守討平之又從劉道規討桓謙荀林等率厲文武身先士

卒所向摧破及徐道覆來逼道規親出拒戰道濟戰功
居多高祖北伐道濟為前鋒步自淮肥所至諸城戍望
風降服進尅許昌凡拔城破壘俘四千餘人皆釋而遣
之於是夷戎感悅相率歸之者甚衆進據潼關與諸將
軍共破姚紹長安既平以為征虜將軍瑯邪內史高祖
受命轉護軍領石頭戍聽直入殿尋以佐命功改封永
脩縣公

向靖字奉仁小字彌河內山陽人名與高祖同改稱小

字世居京口與高祖少舊從平京城叅建武軍事進平
京邑行叅鎮軍事加寧遠將軍京邑雖平而羣寇互起
彌與劉蕃孟龍符征破桓歆桓石康石綏於白茅攻壽
陽尅之晉安帝義熙三年遷建武將軍秦郡太守北陳
留內史戍堂邑以平京城功封山陽縣五等侯從征鮮
卑大戰於臨朐累日不決彌與檀韶等分軍自間道攻
臨朐城彌擐甲先登即時陷潰斬其牙旗賊遂奔走攻
拔廣固彌又先登盧循屯據蔡州以親黨阮賜為豫州

刺史攻逼姑熟彌率譙國內史趙恢討之時輔國將軍
毛脩之戍姑熟告急續至彌兼行進討破賜收其輜重
除中軍諮議叅軍將軍如故盧循退走高祖南征彌為
前鋒於南陵雷池左里三戰並大捷軍還除太尉諮議
叅軍下邳太守將軍如故八年轉游擊將軍尋督馬頭
淮西諸軍事龍驤將軍鎮蠻護軍安豐汝陰二郡太守
梁國內史戍壽陽以平廣固盧循功封安南縣男食邑
五百戶十年遷冠軍將軍高陽內史臨淮太守領石頭

戎事高祖西征司馬休之以彌為吳興太守將軍如故
明年高祖北伐彌以本號侍從留戍碣磈進屯石門栢
谷遷督北青州諸軍事北青州刺史將軍如故高祖受
命以佐命功封曲江縣侯食邑千戶

劉懷慎始叅高祖鎮軍將軍事振威將軍彭城內史從
征鮮卑每戰必身先士卒及克廣固懷慎率所領先登
從高祖拒盧循於石頭屢戰克捷加輔國將軍晉安帝
義熙八年以本號監北徐州諸軍事鎮彭城尋加徐州

刺史為政嚴猛境內振肅九年亡命王靈秀為寇討平之十一年進北中郎將以平廣固盧循功封南城縣男食邑五百戶十三年高祖北伐以為中領軍征虜將軍宿衛輦轂坐府內相殺免官宋臺建召為五兵尚書仍督江北淮南諸軍前將軍南徐州刺史復徵為度支尚書加散騎常侍高祖遷都壽春留懷慎督北徐充青淮北諸軍事前軍將軍徐州刺史以亡命入廣陵城降號征虜將軍永初元年以佐命功進爵為侯增邑千戶進

號平北將軍

劉懷肅初為賞令聞高祖起義奔縣來奔京邑平定振
武將軍劉道規追桓玄以懷肅為司馬玄留何澹之郭
欽等戍桑落州進擊破之玄既死從子振大破義軍於
楊林義軍退尋陽懷肅與江夏相張暢之攻澹之於西
塞破之偽鎮東將軍馮該戍夏口東岸孟山圖據曾山
城桓仙客守月壘皆連壁相望懷肅與道規攻之躬擐
甲胄陷二城馮該走石城生擒仙客晉安帝義熙元年

正月振敗走道規遣懷肅平石城斬馮該及其子山靖
三月振復襲江陵荊州刺史司馬休之出奔懷肅自雲
杜馳赴晝夜兼行七日而至振勒兵三萬旗幟蔽野躍
馬橫矛躬自突陣流矢傷懷肅額衆懼欲奔懷肅瞋目
奮戈膽氣益壯於是士卒爭先臨陣斬振首江陵既平
休之反鎮執懷肅手曰微子之力吾無所歸矣偽輔國
將軍符嗣馬孫偽龍驤將軍金符靚樂志等屯結中夏
懷肅又討之臬樂志等道規懷肅督江夏九郡權鎮夏

口除通直郎仍為將軍淮南歷陽二郡太守二年又領
劉毅撫軍司馬軍郡如故以建義功封東興縣侯食邑千

戶

劉粹字道冲粹家在京口少有志幹初為州從事高祖
克京城參建武軍事從平京邑轉參鎮軍事尋加建武
將軍沛郡太守又領下邳太守復為車騎將軍參軍從
征廣固戰功居多以功封西安縣五等侯軍還轉中軍
諮議參軍盧循逼京邑京口任重太祖時年四歲高祖

使粹奉太祖鎮京城轉遊擊將軍遷建威將軍江夏相
衛將軍毅粹族兄也粹盡心高祖不與毅同高祖欲謀
毅衆並疑粹在夏口高祖愈信之及大軍至粹竭其誠
力事平封澠縣男食邑五百戶母憂去職俄而高祖討
司馬休之起粹為寧朔將軍竟陵太守統水軍入河明
年進號輔國將軍遷相國左司馬侍中中軍司馬冠軍
將軍遷左衛將軍永初元年以佐命功改封建安縣侯
食邑千戶

王鎮惡北海劇人也或薦於高祖即召之既至與語甚異焉以為青州治中從事行叅中軍太尉軍事署前部賊曹拒盧循於查浦屢戰有功封博陸縣五等子後以討劉毅功封漢壽縣子食邑五百戶又討平蠻帥向博抵根除游擊將軍高祖北伐鎮惡行龍驤將軍領前鋒鎮惡入賊境戰無不捷邵陵許昌望風奔散破虎牢及栢谷塢斬賊帥趙玄軍次維陽偽陳留公姚洸歸順進次澠池遣司馬毛德祖攻偽弘農太守尹雅於蠡城生

擒之仍行弘農太守方軌徑據潼關偽大將軍姚
紹率大衆拒險深溝高壘以自固鎮惡懸軍遠入轉輸
不克與賊相持久將士乏食乃親到弘農督上民租百
姓競送義粟軍食復振紹又病死偽撫軍將軍姚讚代
紹守險衆力猶盛高祖至湖城讚引退大軍次潼關謀
進取之計鎮惡率衆水軍自河入渭偽鎮北將軍姚強
屯兵涇上鎮惡遣毛德祖擊破之直至渭橋鎮惡所乘
皆蒙衝小艦行船者悉在艦內羌見艦沂渭而進艦外

不見有乘行船人北土素無舟楫莫不驚惋咸謂為神
鎮惡既至令將士食畢便棄船登岸渭水流急倏忽間
諸艦悉逐流去時姚泓屯軍在長安城下猶數萬人鎮
惡乃身先士卒衆亦知無復退路莫不騰踊爭先泓衆
一時奔潰即陷長安城泓挺身逃走明日率妻子歸降
城內夷晉六萬餘戶鎮惡宣揚國恩撫慰初附號令嚴
肅百姓安堵高祖將至鎮惡於霸上奉迎高祖勞之曰
成吾霸業者卿也進號征虜將軍

趙倫之字幼成高祖起兵以軍功封閬中縣五等侯累遷雍州刺史高祖北伐倫之遣順陽太守傅宏之扶風太守沈田子出峽柳大破姚泓於藍田及高祖受命以佐命功封霄城縣侯安北將軍鎮襄陽

到彥之字道豫彭城武原人高祖討孫恩以鄉里樂從每有戰功義旗將起彥之家在廣陵臨州武烈王道規尅桓宏彥之時近行聞事捷馳歸而道規已南渡江倉卒晚方獲濟及至京口武帝已向鄴孟昶居守留之及

見高祖被責不自陳杲又不為申理故不加官晉安帝
義熙元年補鎮軍行參軍六年盧循逼都彥之與檀道
濟掩循輜重與循黨荀林戰敗免官後以軍功封狼山
縣子為太尉中兵參軍驃騎將軍道鄰鎮江陵以彥之
為驃騎諮議參軍尋遷司馬南郡太守又從文帝西鎮
徐使持節南蠻校尉高祖受命進爵為侯

胡藩豫章人高祖召為員外散騎侍郎參軍事從征鮮
卑賊屯聚臨朐藩言於高祖曰賊屯軍城外內守必寡

今往取其城而斬其旗幟此韓信所以克趙也高祖乃遣檀韶與藩等潛往既至即克其城賊見城陷一時奔走還保廣固累月未拔之夜佐史並集忽有鳥大如鵝蒼黑色飛入高祖帳裏衆皆駭愕以為不祥藩起賀曰蒼黑者胡虜之色胡虜歸我大吉之祥也明旦攻城陷之從討盧循於左里頻戰有功封吳江縣五等子除正員郎尋轉寧遠將軍鄱陽太守從伐劉毅毅初當之荊州表求東道還京辭墓去都數十里不過拜闕高祖出

倪塘會之藩勸於座殺毅高祖不從至是謂藩曰吾從
倪塘之謀無今舉也又從征司馬休之復為叅軍加建
武將軍領遊軍於江津徐達一作走之敗沒高祖怒甚即

日於馬頭岸渡江而江津岸峭壁立數丈休之臨岸置
陳無繇可登高祖呼藩令上藩有疑色高祖奮怒命左
右擒來欲斬之藩不受命顧曰藩寧前死耳以刀頭穿
岸劣容脚指於是直上隨之者稍多既得登岸殊死戰
之賊不能當引退因而乘之一時奔潰高祖伐羌假藩

寧朔將軍叅太尉軍事統別軍至河東暴風飄輜重艦
渡北岸虜牽得此艦取其器物藩氣厲心憤率左右十二
人乘小船逕往河北賊騎五六百見藩來並笑之藩素
善射登岸射賊應弦而倒者十許人賊皆奔退悉收所
失而反又遣藩及朱超石等破索虜於平城虜騎數重
藩及超石所領皆割配新軍不盈五千率厲力戰大破
之又與超石等擊姚業於蒲坂超石失利退還藩收超
石所捨資實徐行而反業不敢追高祖還彭城叅相國

軍事時盧循餘黨與蘇淫等大相聚結以為始興相論
平司馬休之及廣固功封陽山縣男食邑五百戶

虞丘進東海郟人晉安帝隆安中從高祖征孫恩頻戰
有功元興元年從高祖東征臨海於石步固與盧循相
守二十餘日二年又從高祖至東陽破徐道覆其年又
至臨松穴破賊追至永嘉千江又至安固累戰皆有功
三年從平京城定京邑除燕國內史義熙二年除龍驤
將軍封龍川縣五等侯從高祖伐廣固於臨朐破賊盧

循逼京邑孟昶諸葛長民等建議奉天子過江進廷議不可面折昶等高祖甚嘉之獻計伐樹樹柵石頭除鄱陽太守將軍如故統馬步十八隊於東道出鄱陽至五畝橋循遣將莫糾為上饒令千餘人守故城進攻破之循又遣童敏之為鄱陽太守據郡進從餘千步道趣鄱陽敏之退走追破之斬首數百復隨劉藩至始興討斬徐道覆八年除寧蠻護軍尋陽太守十年從征劉毅事平補太尉行叅軍尋加振威將軍九年以前後功封望

蔡縣男食邑五百戶加龍驤將軍討司馬休之又有戰
功軍還除輔國將軍山陽太守宋臺令書除秦郡太守
督陳留郡事將軍如故元熙二年宋王令書以為高祖
第四子義康右將軍司馬

孟懷玉世居京口高祖東伐孫恩以懷玉為建武司馬
豫義旗從平京城進定京邑以功封鄱陽縣侯食邑千
戶高祖鎮京口以懷玉為鎮軍叅軍下邳太守晉安帝
義熙三年出為寧朔將軍西陽太守新蔡內史除中書

侍郎轉輔國將軍領丹陽府兵戍石頭盧循逼京邑懷
玉於石頭岸連戰有功為中軍諮議參軍賊帥徐道覆
屢欲以精銳登岸畏懷玉不敢上及循南走懷玉與衆
軍追躡直至嶺表徐道覆屯結始興懷玉攻圍之身當
矢石旬月乃陷仍南追循循平又封陽豐縣男食邑二
百五十戶復為太尉諮議參軍征虜將軍

劉鍾彭城人晉安帝隆安中高祖伐孫恩鍾願從每戰
有功自義旗將建板為郡主簿從入京城將向京邑高

祖命曰預是彭沛鄉人赴義者並可依劉主簿於是立
為義隊常在左右連戰皆捷明日桓謙屯于東陵卞範
之屯覆舟山高祖疑賊有伏兵顧視左右正見鍾謂之
曰此山下當有伏兵卿可率部下稍往撲之鍾應聲馳
進果有伏兵數百一時奔走桓玄西奔其夕高祖止桓
謙故營遣鍾宿據東府轉鎮軍參軍督護桓歆寇歷陽
遣鍾助豫州刺史魏詠之討之歆即奔進除南齊國內
史封安丘縣五等侯從征廣固除振武將軍廣川太守

盧循逼京邑鍾率麾下距柵身被重瘡賊不得入循南走鍾與輔國將軍王仲德追之循先留別帥范崇民以精兵高艦據南陵夾屯兩岸鍾自行覘賊天霧賊鈎得其舸鍾因率左右攻艦戶賊遽閉戶拒之鍾乃徐還與仲德攻崇民崇民敗走鍾追討百里燒其船乘又隨劉藩追徐道覆於始興斬之補太尉行叅軍寧朔將軍高祖討劉毅鍾率軍繼王鎮惡江陵平定與朱齡石伐蜀平之以廣固功封永新縣男恭帝元熙元年終右衛將

軍

褚叔度為高祖諮議叅軍署中兵加建威將軍從伐鮮卑盡其誠力盧循攻查浦叔度力戰有功循南走高祖板行廣州刺史領平越中郎將

孫處字季高會稽永興人少任氣高祖東征孫恩季高隨高祖平定京邑以為振武將軍封新夷縣五等侯廣固之役先登有功

傅宏之字仲度高祖義旗建輔國將軍劉道規以為叅

軍寧遠將軍魏興太守盧循作亂桓石綏自上雒甲口
自號荊州刺史徵陽令王天恩自號梁州刺史襲據西
城時宏之父韶為梁州遣宏之討石綏等並斬之除太
尉行參軍從征司馬休之署後部賊曹仍為建威將軍
順陽太守高祖北伐宏之與扶風太守沈田子等七軍
自武關入偽上雒太守脫身奔走進據藍田招懷戎晉
晉人龐斌之戴養胡人康橫等各率部落歸化為桂陽
王義真雍州治中從事西戎司馬寧朔將軍與義真同

沒佛佛

齊薛淵汾陰人從父安都為宋徐州刺史以彭城降魏親族皆入北太祖鎮淮陰淵遁來南委身自結果幹有氣力太祖使領部曲備衛帳內從征伐宋後廢帝元徽末以勲官至輔國將軍右軍將軍驍騎將軍軍主封竟陵侯沈攸之難太祖入朝堂豫章王嶷代守東府使淵領軍屯司徒左府分備京邑袁粲據石頭豫章王嶷夜登西門遙呼淵驚起率軍赴難先至石頭焚門攻戰事

平明旦衆軍還集杜姥宅街路皆滿宮門不開太祖登南掖門樓處分衆軍各還本頓至食後城門開淵方得入見太祖且喜且泣太祖即位增邑為二千五百戶除淮陵太守加寧朔將軍

陳顯達仕宋為羽林監濮陽太守隸太祖討桂陽王休範舉兵至新亭壘宋劉劭大衍敗賊進杜姥宅及休範死太祖欲還衛宮城或諫太祖曰桂陽雖死賊黨猶熾人情難固不可輕動太祖乃止遣顯達率司空參軍高

敬祖自查浦渡淮緣石頭北道入承明門屯東堂宮中
恐動得顯達至乃稍定齊臺建為散騎常侍左衛將軍
領衛尉太祖即位遷中護軍增邑千六百戶轉護軍將
軍

戴僧靜少為太祖撫畜常在左右魏軍圍角城遣僧靜
戰盜數捷補帳內軍主隨還京師勲階至積射將軍羽
林監沈攸之事太祖入朝堂僧靜為軍主後袁粲據石
頭太祖遣僧靜將腹心先至石頭時蘇烈據倉城僧靜

將書與烈夜縋入城，築登城西南門，列燭火，乃分臺軍至射之火，乃滅。迴登東門，其黨輔軍將軍孫曇、瓊、驍、勇善戰，每盪一合，輒大殺傷官軍死者百餘人。軍主王天生殊死拒戰，故得相持。自亥至丑，有流星赤色，炤地墜城中。僧靜率力攻倉門，身先士卒，率衆潰。僧靜殺祭於外，軍燒門入。僧靜以功除前軍將軍，寧朔將軍，宋順帝昇明二年，除游擊將軍。攸之平論，封諸將以僧靜為建昌縣侯，邑千戶。太祖即位，增邑千二百戶，除南濟陰。

太守

荀伯玉初為太祖冠軍刑獄參軍太祖為明帝所疑及徵為黃門郎深懷憂伯玉勸太祖遣數十騎入魏界安置標榜於是魏游騎數百履行界上太祖以聞猶懼不得留令玉卜伯玉斷卦不成行而宋明帝詔果復太祖本任繇是親侍後為太祖驃騎中兵參濟陽太守霸業既建伯玉忠勤盡心常衛左右加前軍將軍隨太祖太尉府轉中兵將軍太守如故建元元年封南豐縣子四百戶

轉輔國將軍武陵王征虜司馬

曹虎字士威宋明帝時太祖為領軍補防殿隊主直西齋蒼梧廢明日虎欲出外避難遇太祖在東華中門問虎何之虎因曰故欲仰見明公耳仍留直衛太祖鎮東府以虎與戴僧靜各領日直三百人累至屯騎校尉帶南城令豫平石頭封羅江縣男除前軍將軍太祖受禪增邑為四百戶直閣將軍領細仗主尋除寧朔將軍東莞太守

尹略淮南人少伏事太祖晚習騎射以便捷見使為將
宋順帝昇明中為虎賁中郎將越騎校尉建元初封平
固男三百戶

桓康北蘭陵承人也勇果驍悍宋孝武大明中隨太祖
為軍容從世祖在贛縣後為世祖冠軍府參軍除殿中
將軍武騎常侍出補襄賁令桂陽事起康棄縣還都就
太祖會事已平除員外郎宋元徽五年七月六日夜少
帝微行至領軍府帝左右人曰一府皆眠何不緣牆入

帝曰我今夕欲一處作適待明日夜康與太祖所養健兒盧荒向黑於門間聽得其語明旦王敬則將帝首至扣府門康謂是變與荒拔白刃欲出仍隨入宮太祖鎮東府除康武陵王中兵寧朔將軍帶蘭陵太守常衛左右建元元年封吳平縣伯五百戶轉輔國將軍左軍將軍游擊將軍太守如故

周山圖為宋左中郎將時武陵王贊為郢州太守令山圖領兵衛送世祖與晉熙王燮自郢下以山圖為後防

沈攸之事起世祖為西討都督啟山圖為軍副世祖留
據湓城衆議以湓城城小難固不如還都山圖曰今據
中流為四方勢援大衆致力川岳可為城隍小事不足
難也世祖使城局參軍劉皆陳淵委山圖以處分事山
圖斷取行旅船板以造樓櫓立水柵旬日皆辦世祖甚
嘉之授前軍將軍加寧朔將軍進號輔國將軍攸之攻
郢城世祖令山圖量其勢山圖曰攸之見與鄰鄉承同
征伐悉其為人性度險刻無以結國士心如頓兵堅城

之下適所以為離散之漸耳攸之既敗平西將軍黃回乘輕舸從白服萬餘人在軍前下流緣叫湓城中恐須臾知是回凱歸乃安世祖謂山圖曰周公前言可謂明於見事矣還都太祖遣山圖領部曲鎮郢城鎮戍諸軍悉受節度遷游擊將軍輔國將軍如故建元元年封晉興縣男邑三百戶

梁沈約高祖在西邸與約有舊建康城平引為驃騎司馬征虜將軍時高祖王業既就天人允屬約嘗扣其端

高祖默而不應佗日又進曰今與古異不可以淳風期
萬物士大夫攀龍附鳳者皆望有尺寸之功以保其福
厥今童兒牧豎悉知齊祚已終莫不云明公其人也天
文人事表草運之徵永元以來尤為彰著識云行中水
作天子此又歷然在記天心不可違人情不可失苟是
歷數所至雖欲諫光亦不可得已高祖曰吾方思之對
曰初起兵樊沔此時應思今王業已就何所復思昔武
王伐紂始入民便曰吾君武王不違民意亦無所思公

自至京邑已移氣序比於周武遲速不同若不早定大業稽天人之望脫有一人立異便損威德且人非金石時事難保豈可以建安之封遺之子孫若天子還都公卿在位則君臣分定無復異圖君明於上臣忠於下豈復有人方更同公作賊高祖然之約出高祖召范雲告之雲對畧同約旨高祖曰智者乃爾暗同卿明早將休文更來雲出語約曰卿必待我雲諾許而約先期入高祖令草其事約乃出懷中詔書并諸選置高祖初無

所改俄而雲自外來至殿門不得入徘徊壽光閣外但云咄咄約出雲問曰何以見處約舉手向左雲笑曰不乖所望有頃高祖召范雲謂曰生平與沈休文羣居不覺有異人處今日才智縱橫可為明識雲曰公今知約不異約今知公高祖曰我起兵於今三年矣功臣諸將實有其勞然成帝業者乃卿二人也

王茂為雍州長史高祖以王佐許之事無大小皆詢焉人或諧茂帝弗之信諧者驟言之遣視其甲稍則蟲網

馬乃誅言者或云茂與帝不睦帝諸腹心並勸除之而
茂少有驍名帝又惜其用曰將舉大事便害健將此非
上策乃令腹心鄭紹叔往候之遇其臥因問疾茂曰我
疾可耳紹叔曰都下殺害日甚使君家門塗炭今欲起
義長史那猶臥茂因擲枕起即袴褶隨紹叔入見帝大
喜下牀迎因結兄弟被推赤心遂得盡力發雍部遣茂
為前驅郢魯既平從帝東下為軍鋒師次秣陵東昏遣
大將王珍國盛兵朱雀門衆號二十萬及戰帝軍引却

茂下馬單刀直前外甥韋欣慶勇力絕人執鐵纏稍翼
茂而進故大破之茂勳第一欣慶力也建康城平以茂
為護軍將軍遷侍中領軍將軍

張惠紹字德繼少有武幹初仕齊為竟陵橫桑戍主母
喪歸鄉里聞高祖起兵乃自歸累有戰功高祖踐祚封
石陽縣侯位驍騎將軍直閣左細仗主時東昏餘黨數
百人竊入南北掖門夜燒神獸門害衛尉張宏策惠紹
馳率所領赴戰賊乃敗走遷太子右衛率

曹景宗字子震新野人高祖為雍州刺史表為冠軍將
軍竟陵太守及義師起高祖至景陵以景宗與冠軍將
軍王茂濟江圍郢城自二月至於七月城乃降復帥眾
前驅至南州領馬步軍取建康道至江寧東昏將李居
士以重兵屯新亭是日選精騎一千至江寧行頓景宗
始至安營未立且師行日久器甲穿弊居士望而輕之
因鼓噪前薄景宗景宗被甲馳戰短兵裁接居士棄甲
奔走景宗皆獲之因鼓而前徑至阜英橋築壘景宗又

與王茂呂僧珍犄角破王珍國於大航茂衝其中堅應時而陷復與衆軍長圍六門城平拜散騎常侍右衛將軍封湘西縣侯食邑一千六百戶

呂僧珍字元瑜高祖臨雍州為中兵參軍委以心膂僧珍陰養死士歸之者甚衆高祖頗招武猛士庶響從會者萬餘人因命按行城西空地將起數千間屋以為止舍多伐材竹沈於檀溪積茅蓋若山阜皆未之用僧珍獨悟其旨亦私具槽數百張義兵起高祖夜召僧珍及

張宏策定議明日乃會衆發兵悉取檀溪材竹裝為艘
艦葺之以茅並立辦衆軍將發諸將果爭櫓僧珍乃出
先所具每船付二張爭者乃息及建康城平高祖命僧
珍率所領先入清宮與張宏策封簡府庫即日以本官
帶南彭城太守遷給事黃門侍郎領武賁中郎將高祖
受禪以為冠軍將軍前軍司馬封平固縣侯邑一千二
百戶

夏侯詳譙郡譙人也在齊為司州刺史辭不之職高祖

義兵起詳與蕭穎胄同創大舉西臺建以詳為中領軍
加散騎常侍南郡太守凡軍國大事穎胄多決於詳及
高祖圍郢城下穎胄遣衛尉席闡文如高祖軍詳獻議
曰窮壁易守攻取勢難頓甲堅城兵家所忌誠宜大弘
經畧詢納羣言軍主以下至於鄙夫皆令獻其所見盡
其所懷擇善而從選能而用不以人廢言不以多問寡
又須量我衆力度賊樵糧窺彼人情權其形勢若使賊
人衆而食少故宜計日而守之食多而力衆故宜悉衆

而攻之若使糧力俱足非攻守所屈便宜散金寶縱反
間使彼智者不用愚者懷猜此魏武之所以定大業也
若三事未可宜思變通觀於人情計我糧穀若德之所
感萬里同符仁之所懷遠邇歸義金帛素積糧道又充
乃可以列圍寬守引以歲月此王翦之所以尅楚也若
圍之不卒降攻之未可下間道不能行金粟無人積天
下非一家人情難可豫此則宜更思變計矣變計之道
實資英斷謀之所深要難以紙宣輒布言於席衛尉特

願垂採高祖嘉納焉天監元年徵為侍中車騎將軍論
功封寧都縣侯邑二千戶

鄭紹叔字仲明滎陽人高祖臨司州命為中兵參軍領
長流因是厚自結附高祖舉義兵以為驍騎將軍侍從
東下江州留紹叔監州事督江湘二州糧運無闕乏天
監初入為衛尉卿封營道縣侯邑千戶加冠軍將軍以

營道縣戶彫弊改封東興縣侯邑如故

紹叔自高祖臨
司州為中兵參

軍領長流因是厚自結附高祖罷州還京師謝遠賓客
紹叔獨固請願留高祖謂曰卿才幸自有用我今未能

相益宜更思他途紹叔曰委質有在義無二心高祖固
不許於是乃還壽陽及高祖為雍州刺史紹叔問道西
歸補寧蠻長史扶風太守東昏既害朝宰疑高祖紹叔
兄植為東昏直後東昏遣至雍州託以候紹叔實潛使
為刺客紹叔知之密以告高祖植既至高祖於紹叔處
置酒宴之戲植曰朝廷遣卿見圖今日聞宴是見取良
會也賓主大笑令植登臨城隍周觀府署士卒器械舟
艦戎馬莫不富實植退謂紹叔曰雍州實力未易圖也
紹叔曰兄還具為天子言之若取雍州紹叔
請以此衆一戰送兄於南峴相持慟哭而別

楊公則字君翼天水人為荊州西中郎參軍高祖舉義
師於雍州以為西中郎諮議中兵參軍率衆東下時湘
州行事張寶積發兵自守未知所附公則軍及巴陵仍

回師南討軍次白沙寶積懼釋甲以俟焉公則到州撫
納之湘境遂定齊和帝即位授持節都督湘州諸軍事
湘州刺史高祖勅衆軍次于沔口增山城主孫樂祖郢
州刺史張冲各據城未下公則率湘府之衆會于夏口
時荊州諸軍悉受公則節度雖蕭穎達宗室之貴亦隸
焉累進征虜將軍左衛將軍持節刺史如故郢城平高
祖命衆軍即日俱下公則受命先驅徑掩柴桑江州即
定連旌東下直造京邑公則號令嚴明秋毫不犯所在

莫不賴焉天監元年進號平南將軍封寧都縣侯

柳慶遠為高雍州別駕從事齊方多難慶遠謂所親曰
方今天下將亂英雄畢起庇民定霸其吾君子因盡誠
協贊及義兵起慶遠嘗居帷幄為謀主遷冠軍征東長
史從軍東下身先士卒高祖行營壘見慶遠頓舍嚴整
每歎曰人人若是吾又何憂建康城平入為侍中領前
軍將軍城內常夜火禁中驚懼高祖時居宮中悉斂諸
鑰問柳侍中何在慶遠至悉付之其見任如此霸府建

以為太尉從事中郎高祖受禪遷散騎常侍右衛將軍
加征虜將軍封重安侯食邑千戶

蕭穎達蘭陵人也為西中郎外兵參軍高祖舉義為冠
軍將軍及楊公則等率師隨高祖曹景宗等圍郢城穎
達會軍於漢口與王茂攻郢城陷之隨高祖平江州高
祖進溧州使與曹景宗先率馬步進趨江寧破東昏將
李居士又下東城建康城平高祖以穎達為前軍將軍
丹陽尹及大論功賞封穎達吳昌縣侯邑千五百戶

鄧元起字仲居南郡當陽人也為平南中兵參軍高祖
義師東下為冠軍將軍率衆與高祖會于夏口高祖命
王茂曹景宗及元起等圍郢城結壘九里刺史張冲屢
戰輒大敗乃嬰城固守齊和帝即位授節冠軍將軍平
越中郎將廣州刺史遷給事黃門侍郎移鎮南堂總西
渚軍事中興元年七月郢城降以本號為益州刺史仍
為前軍先定尋陽及大軍進至京邑元起築壘於建陽
門與王茂曹景宗等合長圍身當鋒鏑建康城平進號

征虜將軍天監初封當陽縣侯食邑一千二百戶

庾域字司大高祖舉義兵以為寧朔將軍領行選從高祖東下師次陽口齊和帝遣御史中丞宗史銜命勞軍域乃諷史曰黃鉞未加非所以總率侯伯史反西臺即授高祖黃鉞蕭穎胄既都督中外諸軍事論者謂高祖應致賤域爭不聽乃止郢城平域及張宏策議與高祖意同即命衆軍使下每獻謀畫多被納用天監初封廣牧縣子

張宏策為高祖雍州錄事參軍帶襄陽令高祖覩海內
方亂有拯濟之心密為儲備謀猷所及唯宏策而已及
義師將起高祖夜召宏策呂僧珍入宅定議旦乃發兵
以宏策為輔國將軍軍主領萬人督後部軍事西臺建
為步兵校尉遷車騎諮議參軍及郢城平蕭穎達楊公
則諸將皆欲頓軍夏口高祖以為宜乘勢長驅直指京
邑以計語宏策與高祖意合又訪寧朔將軍庾域域又
同乃命衆軍即日出道沿江至建康凡磯浦村落軍行

宿次立頓處所宏策逆為圖測皆在目中義師至新林
王茂曹景宗等於大航方戰高祖遣宏策持節勞勉衆
咸奮厲是日仍破朱雀軍高祖入頓石頭城宏策屯門
禁衛引接士類多所全免天監初加散騎常侍洮陽縣
侯邑一千二百戶

宏策文獻皇后從父弟齊明帝建武
末從高祖宿酒酣徙席星下語及時

事宏策因問高祖曰緯象云何國家故當無恙高祖曰
其可言乎宏策因曰請言其兆高祖曰漢北有失地氣
浙東有急兵祥今冬初魏必動若動則亡漢北帝今以
疾多異議上下同蒙諸部且乘機而作是以無成徒驅
除耳明年都邑有大亂死人過於亂麻齊之歷數自茲
亡矣梁楚樊漢當有英雄興宏策曰英雄今何在為已

富貴為草茅高祖笑曰先武有云安知非僕宏策起曰
今夜言是天意也請定君臣之分高祖曰舅欲效酈晨
乎是冬魏軍寇新野高祖將兵為援且受密旨仍代曹
武為雍州宏策聞之心喜謂高祖曰夜中之言獨當驗
矣高祖笑曰且勿多言宏策從高祖西行仍參帷幄身
親勞役不憚辛苦及為高祖雍州錄事參軍時長沙宣
武王罷益州還仍為西中郎長史行郢州事高祖使宏
策陳計於宣武王宏策因說王曰昔周室既衰諸侯力
爭齊桓蓋中人耳遂能一匡九合於今稱之齊德告微
四海方亂蒼生之命會應有主以郢州居中流之要雍
部有戎馬之饒卿兄弟英武當今無敵虎據兩州三分
天下糾合義兵為百姓請命廢昏立明易於掌握如此
則桓文之業可成不世之功可建無為豎子所敗取笑
身後雍州搆之已熟願圖之天頗不憚而無以拒也

蔡道恭字懷儉齊和帝鎮荊州以為西中郎中兵參軍

輔國將軍高祖舉義師于雍州蕭穎胄以道恭舊將素著威畧專相委任遷冠軍將軍西中郎諮議參軍仍轉司馬中興元年遷右衛將軍天監初論功封漢壽縣伯邑七百戶

冊府元龜卷三百四十四

欽定四庫全書

冊府元龜卷三百四十五 宋 王欽若等 撰

將帥部

佐命第六

陳杜僧明字宏照廣陵人梁大同中與周文育並為廣州南江督護盧安興啟與俱行後安興死高祖在公安引為主帥侯景之亂隨高祖入援京師高祖於始興破蘭裕為前鋒擒裕斬之又與蔡路養戰於南野僧明馬

被傷高祖馳往救之以所乘馬授僧明僧明乘馬與數十人復進衆皆披靡因而乘之大敗路養高州刺史李遷仕又據大臯入潯石以逼高祖高祖遣周文育為前軍與僧明擊走之遷仕與寧都人劉孝尚併力將襲南康高祖又令僧明與文育等拒之相持連戰百餘日卒擒遷仕送于高祖軍及高祖下南康留僧明頓西昌督安成廬陵二郡軍事梁元帝承制授假節陵野將軍新州刺史臨江縣子邑三百戶侯景遣于慶等寇南江高

祖頓豫章命僧明為前驅所向尅捷高祖表僧明為長
史仍隨東討軍至蔡州僧明率麾下燒賊水門大艦及
景平以功除員外散騎常侍明威將軍南兗州刺史進
爵為侯增邑并前五百戶仍領晉陵太守承聖二年從
高祖北圍廣陵加使持節遷通直散騎常侍平北將軍
餘如故荊州陷高祖使僧明率吳明徹等隨侯瑱西援
于江州病卒

周文育字景德義興陽羨人也廣州監州王勣以為長

流令勦被代文育與勦俱下至大庾嶺文育辭勦勦遣之高祖時高祖在高要聞其還也大喜遣人迎之厚加賞賜分麾下配馬高祖之討侯景文育與杜僧明為前軍克蘭裕援歐陽頎皆有功高祖破蔡路養于南野文育為路養所圍四面數重矢石雨下所乘馬死文育右手搏戰左手解鞍潰圍而出因與杜僧明等相得并力復進遂大敗之高祖乃表文育為府司馬李遷仕之據大鼻遣其將杜平虜入瀨石魚梁作城高祖命文育擊

之平虜棄城走文育據其城遷仕聞平虜敗留老弱於
大臯悉選精兵自將以攻文育其鋒甚銳軍人憚之文
育與戰遷仕稍却相持未解會高祖遣杜僧明來援別
破遷仕水軍遷仕衆潰不敢過大臯直走新淦梁元帝
授文育假節雄信將軍義州刺史遷仕又與劉孝尚謀
拒義軍高祖遣文育與侯安都杜僧明徐度杜陵築城
於白口拒之文育頻出與戰遂擒遷仕高祖發自南康
遣文育將兵五千開通江路侯景將王伯醜據豫章文

育擊走之遂據其城累前後功除游騎將軍員外散騎
常侍封東遷縣侯邑五百戶高祖軍至白茅灣命文育
與杜僧明常為軍鋒平南陵鵲頭城諸城及至姑熟與
景將侯子鑒戰破之景平投通直散騎常侍改封南移
縣侯邑一千戶拜信義太守累遷南丹陽蘭陵晉陵太
守智武將軍散騎常侍高祖誅王僧辯命文育督衆軍
會世祖於吳興圍杜龕尅之又濟江襲會稽太守張彪
得其郡城及世祖為彪所襲文育時頓城北香巖寺世

祖夜往趨之因共立柵頃之彪又來攻之文育悉力苦戰彪不能克既破平彪高祖以侯瑱據江州命文育討之仍除都督南豫州諸軍事嚴威將軍南豫州刺史率兵襲湓城未尅徐嗣徽引齊寇渡江據蕪湖詔徵文育還京嗣徽等列艦於青墩至於七磯以斷文育歸路及夕文育鼓噪而發嗣徽等不能制至旦反攻嗣徽驍將鮑磻獨以小艦殿軍文育乘單舴艋與戰跳入磻艦斬磻仍牽其艦而還賊衆大駭因留船蕪湖自丹陽步上

時高祖拒嗣徽於白城適與文育相會將戰風急高祖曰矢不逆風文育曰事急矣當決之何用古法抽槊上馬馳而進衆軍從之風亦尋轉殺傷數百人嗣徽等移營幕府山文育徙頓對之頻戰功最加平西將軍進爵壽昌縣公并給鼓吹一部

侯安都字成師始興曲江人梁始興內史蕭子範辟為主簿侯景之亂招集兵甲至三千人高祖援京邑安都引兵從高祖攻蔡路養破李遷仕尅平侯景並力戰有

功梁元帝授猛烈將軍通直散騎常侍富川縣子邑三百戶隨高祖鎮京口除蘭陵太守高祖謀襲王僧辨諸將莫知者唯與安都定計仍使安都率水軍自京口趨石頭高祖自率馬步從江城羅落會之安都至石頭北棄舟登岸僧辨勿之覺也石頭城北接岡阜雉堞不甚危峻安都被甲帶長刀軍人捧之投于女垣內衆隨而入進逼僧辨臥室高祖大軍亦至與僧辨戰于廳事前安都自內閣出腹背擊之遂擒僧辨敬帝紹泰元年以

功授使持節散騎常侍都督南徐州諸軍事仁威將軍
南徐州刺史高祖東討杜龕安都留臺居守徐嗣徽任
約等引齊寇入據石頭安都與戰大敗之及高祖至以
安都為水軍于中流斷賊糧運又襲秦郡破嗣徽柵收
其家口并馬驢輜重得嗣徽所彈琵琶及所養鷹遣信
餉之曰昨至弟住處得此令以相還嗣徽等見之大懼
尋而請和高祖聽其還北及嗣徽等濟江齊之餘軍猶
據采石守備甚嚴又遣安都攻之多所俘獲及為平南

將軍都督水軍出豫章助豫州刺史周文育討蕭勃安
都未至文育已斬勃并擒其將歐陽顏傅泰等唯余孝
頃與勃子孜猶據豫章之石頭作兩城孝頃與孜各據
其一又多設船艦夾水陣安都至乃銜枚夜燒其艦文
育率水軍安都領步騎登岸結陣孝頃俄斷後路安都
乃令軍士多伐松木豎柵列營漸進頻戰屢尅孜乃降
孝頃奔歸新吳請入子為質許之師還以功進號鎮北
將軍加開府儀同三司後為都督南豫州諸軍事鎮西

將軍南豫州刺史令繼周文育攻余孝勵及王琳將曹慶常衆愛等安都自宮亭湖出松門躡衆愛後文育為熊曇朗所害安都迴取大艦值琳將周炤周協南歸與戰破之生擒炤協孝勵弟猷率部下四千家欲就王琳遇周炤敗乃詣安都降又進軍於禽竒洲破曹慶等焚其船艦衆愛奔于廬山為村人所殺餘衆悉平

吳明徹字通昭秦郡人高祖鎮京口深相要結明徹乃詣高祖高祖為之降階執手即席與論當世之務明徹

亦微涉書史經傳就汝南周宏正學天文孤虛遁甲略
通其妙頗以英雄自許高祖深竒之梁元帝承聖二年
授戎昭將軍安州刺史紹泰初隨周文育討杜龕張彪
等東道平授使持節散騎常侍安東將軍南兖州刺史
封安吳縣侯高祖受禪拜安南將軍

胡穎字方秀吳興東遷人也其先寓居吳興土斷為民
穎偉姿容性寬厚梁世仕至武陵國侍郎東宮直前出
番禺征討任廣州西江都護高祖在廣州穎仍自結高

祖高祖與其同郡相遇甚隆及南征交趾穎從行役餘諸將帥皆出其下及平李賁高祖旋師穎隸在西江出兵多以穎留守侯景之亂高祖尅元景仲仍度嶺援臺平蔡路養李遷仕穎皆有功歷平固遂興二縣令高祖進軍頓西昌以穎為巴丘縣令鎮大臯督糧運下至豫章以穎監豫章郡高祖率衆與王僧辨會於白茅灣同討侯景以穎知留府事梁承聖初元帝授穎假節鐵騎將軍羅州刺史封漢陽縣侯邑五百戶尋除豫章內史

隨高祖鎮京口齊遣郭元建出關都督侯瑱率師禦之
高祖選府內驍勇三千人配穎令隨瑱於東關大破之
建元三年高祖圍廣陵齊人東方老據宿預請降以穎
為五原太守隨杜僧明援老不尅退還除曲阿令尋領
馬軍從高祖襲王僧辨又隨周文育於吳興討杜龕梁
敬帝紹泰元年除假節都督南豫州諸軍事輕車將軍
南豫州刺史太平元年除持節散騎常侍仁威將軍尋
兼丹陽尹高祖受禪兼左衛將軍餘如故

徐度字孝節安陸人也世居京師少僮不拘小節及長姿貌瓌偉嗜酒好博嘗使僮僕屠酤為事梁始興內史蕭介赴郡度從之將領士卒征諸山洞以驍勇聞高祖征交趾厚禮招之度乃委質侯景之亂高祖尅定廣州定蔡路養破李遷仕計畫多出於度兼統兵甲每戰有功歸至白茅灣梁元帝授寧朔將軍合州刺史侯景平後追錄前後戰功加通直散騎常侍封廣德縣侯邑五百戶遷散騎常侍高祖鎮朱方除信武將軍蘭陵太

守高祖遣衡陽獻王平荊州刺史度率所領從馬江陵
陷間行東歸高祖平王僧辨度與侯安都為水軍敬帝
紹泰元年高祖東討杜龕奉敬帝幸京口以度領宿衛
并知留府事徐嗣徽任約等來寇高祖與敬帝還都時
賊已據石頭城市廛居民並在南路去臺遙遠恐為賊
所乘乃使度將兵鎮于冶城寺築壘以斷之賊悉衆來
攻不能尅高祖亦救之尋大敗約等明年嗣徽等又引
齊寇濟江度隨衆軍破之于郊壇以功除信威將軍郢

州刺史兼領吳興太守尋遷右將軍領軍將軍徐州沿
江諸軍事鎮北將軍南徐州刺史給鼓吹一部

歐陽頎為臨賀內史當侯景構逆高祖入援京邑將至
始興頎深自結託蘭裕遣兵攻頎高祖援之裕敗高祖
以王懷明為衡州刺史遷頎為始興內史高祖之討蔡
路養李遷仕也頎率兵度嶺以助高祖及養等平頎有
功梁元帝承制以始興郡為東衡州以頎為持節通直
散騎常侍都督東衡州諸軍事雲麾將軍東衡州刺史

新豐縣伯邑四百戶

北齊段榮武威人也高祖建義山東榮贊成大策為大
行臺右丞西北道慰喻大使巡方曉喻所在下之高祖
南討鄴留榮鎮信都仍授鎮北將軍定州刺史時攻鄴
未克所領軍資榮轉輸無闕高祖入雒論功封姑臧縣
侯邑八百戶

斛律金初從後魏爾朱榮為別將頻有戰功為鎮南大
將軍及爾朱兆等逆亂高祖密懷興復之計金與婁昭

庫狄干等贊成大謀仍從舉義高祖南攻鄴留金守信
都領恒雲燕朔顯五州大都督委以從事別討李循破
之加右光祿大夫會高祖於鄴仍從平晉陽追滅爾朱
兆西魏武帝太昌初為汾州刺史進爵為侯

孫騰初為高祖晉州長史及起義信都騰以誠款常預
謀策又以朝廷隔絕號令無所歸不權有所立則衆將
沮散苦請於高祖從之遂立中興主除侍中尋加使持
節六州流民大都督北道大行臺騰以高祖腹心入居

門下與斛斯椿同掌機密椿既生異端漸至乖謬騰深見猜忌慮禍及已遂潛將十餘騎馳赴晉陽高祖入討斛斯椿留騰行并州事又使騰為冀相殷定滄瀛幽安八州行臺僕射行冀州事復行相州事天平初入為尚書左僕射內外之事騰咸知之兼司空尚書令時西魏遣將寇南兗詔騰為南道行臺率諸將討之騰性懦怯無威畧即失利而還又除司徒遷太保騰早依高祖契闊艱危勤力恭儉深見信待及高祖置之魏朝寄以心

腹東魏孝靜武定六年薨文宣天保初以騰佐命詔祭告其墓昭帝皇建中配享高祖廟庭

王懷為第一領民酋長高祖東出懷率其部人三千餘家隨高祖于冀州義旗建高祖以為大都督從討爾朱兆于廣阿破之除安北將軍蔚州刺史又隨高祖攻鄴克之從破四胡于韓陵進爵為侯仍從入雒拜車騎將軍又從高祖襲尅西夏州還為大都督鎮下館除儀同三司

張保維初仕後魏為揚烈將軍奉車都尉後隸高祖為
都督從討步蕃及高祖起義保維為帳內從破爾朱兆
於廣阿尋遷右將軍中散大夫仍以帳內從高祖圍鄴
城既拔除平南將軍光祿大夫從破爾朱兆等于韓陵
因隨高祖入雒加安東將軍從高祖破周文帝於邙山
圍玉壁攻龍門還留鎮晉州文襄嗣位以保維為左廂
大都督

薛孤延為都督從高祖起義破爾朱兆於廣阿因從平

鄴以功轉大都督從破四胡於韓陵加金紫光祿大夫
從追爾朱兆於赤碭嶺除第一領民酋長累加車騎將
軍從征玉壁轉恒州刺史從破周文帝於邛山進爵為
縣公又從高祖討破山胡西攻玉壁入為左衛將軍改
封平秦郡公延性好酒率多昏醉而以勇決善戰每大
軍征討常為前鋒故與彭劉韓潘同列

臣欽若等曰彭
樂劉貴韓軌潘

樂

尉長命太安狄那人性厚有器識扶陽之亂寄居太

原及高祖將建大義長命參計策從高祖破四胡於韓陵拜安南將軍樊子鵠據兗州反除東南道大都督與諸軍討平之轉鎮范陽城就拜幽州刺史督安平二州事

莫多婁貸文太安狄那人也驍果有膽氣從高祖舉義擊爾朱兆於廣阿又從破四胡於韓陵後從平爾朱兆於赤碭嶺兆窮迫自經貸文獲其屍遷左廂大都督

高昂字敖曹後魏末為冀州刺史大都督率衆從高祖

破爾朱兆于廣阿又隨高祖討兆於韓陵昂自領鄉人
部曲王桃湯東方老呼延族等三千人高祖曰高都督
純將漢兒恐不濟事今當割鮮卑兵千餘人共相參雜
於意如何昂對曰教曹所將部曲練習已久前後戰鬪
不減鮮卑今若雜之情不相協勝則爭功退則推罪願
自領漢軍不煩更配高祖然之及戰高祖小却兆等方
乘之高岳韓向奴等以五百騎衝其前斛律敦奴散卒
躡其後昂與蔡雋以千騎自栗園出橫擊兆軍兆衆蹙

是大敗是日微昂等高祖幾殆尋加侍中開府進爵為侯邑七百戶

韓軌字伯年大安狄那人少有志操性深沉喜怒不形于色高祖鎮晉州引為鎮城都督及起兵于信都軌贊成大策從破爾朱兆於廣阿又從破韓陵封平昌縣侯仍督中軍從破爾朱兆于赤碭嶺

後周于謹自太祖初臨夏州為防城大都督夏州長史及賀拔岳破害太祖赴平涼謹乃言于太祖曰魏祚陵

遲權臣擅命羣盜蜂起黔首嗷然明公仗超世之資懷濟時之畧四方遠近咸所歸心願早建良圖以副衆望太祖曰何以言之對曰關中秦漢舊都昔稱天府將士驍勇厥壤膏腴西有巴蜀之饒北有羊馬之利今若據其要害招集英雄養卒勸農足觀時變且天子在維逼迫羣兇若陳明公之懇誠筭時事之利害請都關右帝必喜而遷然後挾天子而令諸侯奉王命以討暴亂桓公之業千載一時也太祖大悅會有勅追謹為門内大

都督帝西遷從太祖征潼關破迴雒城授北雍州刺史
進封藍田公後拜驃騎大將軍開府又從太祖拔弘農
破沙苑又從戰河橋又從攻邙山

侯莫陳崇字尚樂武川人初為建威將軍隨賀拔岳入
關討万俟醜奴及岳被害崇與諸將同謀迎太祖從平
侯莫陳悅累進驃騎大將軍開府從擒竇泰復弘農破
沙苑從戰河橋崇功居多進位柱國六宮建拜大司空
孝閔踐祚進封梁國公邑萬戶

獨孤信武川人與太祖鄉里少相友善後為驃騎大將軍從太祖復弘農破沙苑以功除隴右十一州大都督及楊薦為驃騎大將軍初太祖臨夏州補薦帳內都督及平侯莫陳悅使薦入雒請事魏孝武授太祖關西大行臺仍除薦直閣將軍馮翊長公主嫫居孝武授意欲歸諸太祖乃令武衛元毗喻旨薦歸白太祖又遣薦入雒陽請之孝武即許焉孝武欲向關中薦贊成其計孝武曰卿歸語行臺迎我太祖又遣薦與長史宇文測出關

侯接孝武至長安進爵清水縣子

趙貴武川人初為太祖司馬車騎大將軍從太祖復弘農戰沙苑拜侍中驃騎大將軍開府又從戰河橋又從拔玉壁又從戰邛山拜柱國大將軍賜姓乙弗氏

蔡祐字承先為都督時太祖初臨夏州及侯莫陳悅害賀拔岳諸將遣使迎太祖將赴之夏州首望彌姐元進等陰有異計太祖微知之先與祐議執元進祐曰狼子野心會當反噬今若執縛不如殺之太祖曰汝大快也

於是召元進等入計事太祖曰隴賊逆亂與諸人戮力討之觀諸人輩似有不同者太祖微以此言動之因目祐祐即出外衣甲持刀入瞋目叱諸人曰與人朝謀夕異豈是人也蔡祐今日必斬二人之頭因按劍臨之舉坐皆叩頭曰願有簡擇祐乃坐元進而斬之并其黨並伏誅一坐皆戰慄莫敢仰視於是與諸將結盟同心誅悅太祖以此知重之謂祐曰吾今以爾為子爾其父事我後從討悅破之又從迎魏孝武於潼關以前後功封

長鄉縣伯邑五百戶

李穆字顯慶風神警俊個儻有奇節太祖首建義旗便委質釋褐統軍西魏武帝永熙末奉迎魏武帝授都督封永平縣子邑二百戶又領鄉兵累以軍功進爵為伯從太祖擊齊師於邛山太祖臨陣墮馬穆突圍而進授以從騎潰圍俱出以故得免既而與穆相對泣顧左右曰成我事者其此人乎

隋元冑數從周齊王憲征伐官至大將軍高祖被召入

將受顧命先呼胄次命陶澄並委以心腹嘗宿臥內及為丞相每典軍在禁中又引弟威等俱入侍衛周趙王招知高祖將遷周鼎乃要高祖就第趙王引高祖入寢室左右不得從唯楊宏與胄兄弟坐於戶側趙王謂其二子員貫曰汝當進瓜我因刺殺之及酒酣趙王欲生變以佩刀子刺瓜連啗高祖將為不利胄進曰相府有事不可久留趙王呵之曰我與丞相言汝何為者叱之使却胄瞋目憤氣抽刀入衛趙王問其姓名胄以實對

趙王曰汝非昔事齊王者乎誠壯士也因賜之酒曰吾豈有不善之事意林卿何猜警如是趙王偽吐將入後閣胄恐其為變扶令上座如此者再三趙王稱喉乾命胄就厨取飲胄不動會滕王迴後至高祖降階迎之胄與高祖耳語曰事勢大異可速去高祖猶不悟謂曰彼無兵馬復何能為胄曰兵馬悉他家物一先下手大事便去胄不辭死何益耶高祖入座胄聞屋後披甲聲遽請曰相府事殷公何得如此因扶高祖下牀趨而去趙

王將追之胄以身蔽尸王不得出高祖及門胄自後而至趙王恨不時發彈指出血及誅趙王賞賜不可勝計高祖受禪進位上柱國封武陵郡公邑三千戶拜左衛將軍尋遷右衛大將軍高祖從容曰保護朕躬成此基業元胄功也

李圓通自高祖為相時為帥都督委以心膂圓通多力勁捷長於武用周氏諸王素憚高祖每伺高祖之隙圖為不利賴圓通獲免者數矣高祖深感之繇是參預政

事

唐劉宏基在隋以父廕為右勳侍大業末亡命至大原
會高祖鎮大原因自結託又察太宗有非常之度尤委
心焉及太宗將圖義舉宏基遂募得二千人王威高君
雅欲為變高祖伏宏基及長孫順德於廳事之後威雅
既及宏基麾左右執之又從義師下西河進攻霍邑隋
將宋老生率衆陣於城外宏基從太宗擊之老生敗走
棄馬投塹宏基下斬其首師至河東宏基以兵八千

人先濟河進下馮翊為渭北道大使得便宜從事殷開
山為副西畧地扶風有衆六萬南渡渭水屯于長安故
城威聲大振耀軍金光門衛文昇遣兵來戰宏基逆擊
走之擒甲士千餘人馬數百匹高祖大悅賜馬二十匹
及平京城功第一從太宗擊薛舉于扶風破之追奔至
隴山而返累拜右領都督封河間郡公又從太宗經畧
東都戰于瓔珞門外破之師旋宏基為殿隋將段達張
志陣于三王陵宏基擊敗之武德元年拜右驍衛大將軍

以元謀之勳恕其一死又從太宗平夏縣進封任國公
尋從擊劉黑闥於洺州師旋授秉鉞將軍又以佐命功
賜真食九百戶

盛彥卿隋末為澄城長義師至汾陰率賓客千餘人濟
河上謁高祖拜銀青光祿大夫行軍總管從平京城俄
與史萬寶鎮宜陽以拒東寇

盧士良瀛州刺史士叡之弟仕隋為右親衛大業末見
天下已亂不求仕進潛結英豪及義師西上與兄士叡

同舉兵得百人來謁高祖於汾陰甚蒙接遇以為軍頭
擊桑顯和于飲馬泉敗屈突通于潼關俱有戰功位柱
國

錢九隴善騎射高祖信愛之常置左右義兵起以軍功
授金紫光祿大夫及尅平城拜左監門郎將

任瓌字瑋廬州合肥人隋仁壽中為韓城尉俄又罷職
及高祖討捕於汾晉瓌謁高祖于轅門承制為河東縣
戶曹高祖將之晉陽留隱太子建成以託於瓌義師起

瓌至龍門謁見高祖謂之曰隋氏失馭天下沸騰吾忝
以外戚屬當重寄不可坐觀時變晉陽是用武之地士
馬精強今率驍雄以輔國難卿將家子深有智謀觀吾
此舉將為濟否瓌曰後主殘酷無道征役不息天下忪
忪思聞拯亂天縱神武親舉義師所下城邑秋毫無犯
軍令嚴明將士用命關中所在蜂起惟待義兵仗大順
從衆欲何憂不濟瓌在馮翊積年人情諳練願為一介
之使銜命入關同州已東必當款伏于梁山船濟直指

韓城進逼邠陽分取朝邑且蕭造文吏本無武畧仰懼威靈理當自下孫華諸賊未有適從必當相率而至然後鼓行整衆入據永豐雖未得京城關中故已定矣高祖曰是吾心也迺授銀青光祿大夫遣陳演壽史大柰領步騎六千趨梁山渡河使瓌及薛獻為招慰大使高祖謂演壽曰閩外之事宜與任瓌籌之孫華白玄度等聞兵且至果競來降并具舟于河師遂利涉瓌說下韓城縣與諸將進擊飲馬泉破之拜左光祿大夫留守永

豐倉高祖即位改授穀州刺史王世充數率衆攻新安
瓌拒戰破之以功累封管國公

姜謨秦州上邽人隋大業末為晉陽長會高祖留守太
原見謨深器之謨退謂所親曰隋祚將亡必有命世大
才以應圖錄唐公有霸王之才必為撥亂之主繇是深
自結納及大將軍府建引為司功將軍從平霍邑拔絳
郡監督大軍濟河時兵士爭渡謨部勒諸軍自昏至曉
大軍畢濟高祖稱嘆之平京城除相國兵曹參軍封長

道縣公時薛舉寇秦隴以謨西州之望詔於隴右安撫承制以便宜從事謨將行奏曰天人之望誠有所歸願早膺圖錄以寧兆庶老夫犬馬暮齒恐先朝露得一覩昇紫殿死無所恨高祖大悅謨與竇軌出散關下河池漢陽二郡軍次長道與薛舉相遇軌輕敵為舉所敗徵謨還京拜員外散騎常侍及平薛仁杲拜謨秦州刺史柴紹矯捷有勇力尚武任俠聞于關中高祖龍潛時妻之次女即平陽公主也初太宗見隋大亂陰懷濟天下

之心以紹親戚有武用告其志事紹遂間行出河東與
隱太子建成會既知起義兵建成謀於紹曰追書甚急
恐已起事隋郡縣連城相接千有餘里中間偷路勢必
不全今欲且投小賊權以自濟紹曰不可追書既急宜
其速去雖稍辛苦終當獲全若投小盜知君唐公之子
執以為功徒然死耳建成從之遂相與走太原入雀鼠
谷已知起義于是相賀以紹之計為得太宗拜右軍大
都督以紹為長史加銀青光祿大夫及破霍邑下臨汾

平絳郡並先登陷陣既入關平陽公主以司竹之軍來

會命紹及馬三寶分統其衆

時隋將桑顯和來擊孫華率精騎渡河以援之紹引

軍直掩其背與史大柰合勢擊之顯和大敗因與諸將進下京城

高祖受禪拜左衛大

將軍從太宗平薛舉破宋金剛于雀鼠谷攻王世充於

雒陽平竇建德于武牢並有戰功

馬三寶本柴紹之家僮性狡猾善調鷹犬及紹尚平陽

公主三寶給使于皇家義兵之起也三寶奉平陽公主

遁于司竹投賊帥何潘仁潘仁謁公主以百兵為主衛

三寶自稱總管以主之命綏輯羣盜多來歸款略地鄆
杜有近兵一萬號為娘子軍及義兵濟河授左光祿大
夫太宗至竹林宮三寶以衆數萬詣軍門進謁從平京
師拜大監門率

何潘仁西域胡人父渾邪通商中國隋初始居蓋屋家
富於財潘仁厚自奉養引致賓客煬帝時為幕士鬱鬱
不得志後嘗犯法懼罪遂亡入司竹園中鳩集亡命衆
至數萬執隋前尚書左丞李剛為長史長安以西城邑

多為所破及義兵起求得平陽公主而奉之以應義師
高祖入關即授上柱國封藍屋縣公潘仁馳來謁見高
祖大悅

姜寶誼天水人隋末以軍功致位通議大夫鷹揚郎將
以其府兵從高祖討捕于太原及義兵起授左統軍平
西河下霍邑皆有功焉累轉光祿大夫封永安郡公武
德初拜武衛大將軍

劉政會初仕隋為鷹揚府司馬在太原與晉陽令劉文

靜敦叙宗室亟相往來及高祖行軍于太原政會率兵
隸於麾下太宗與文靜謀圖起義募人既集王威等懷
貳于我後數日將大會于晉陽威及高君雅等謀危高
祖有人以白太宗既知迫急欲先事誅之因遣政會為
急變之書執詣留守所告威君雅二人相與謀反是日
高祖在衙中須臾二人及裴寂相次並集俱坐視事文
靜引政會入至庭中云有密狀知人欲反高祖指威等
令取狀看之政會不肯與曰所告者是副留守事惟唐

公得看之爾高祖佯驚曰豈有是乎為政會進覽狀訖
謂二人曰此人告公事如何君雅起牀前攘袂大吼曰
此是反人欲殺我也時太宗已布列兵馬圍遼周遍王
威知事不免因曰他人誣告只得聽推逐爾文静遂叱
左右引之而下就拘于別室既囚威等竟得舉兵政會
之功也及大將軍府建引為戶曹參軍從平長安以佐
命元勳蒙歷任委

竇琮有武幹初仕隋佐親衛大業末犯法亡命之太原

依于高祖時太宗方收英傑與琮有舊親敬彌篤出入
臥內將義舉琮協贊大謀大將軍府建以為統軍從平
西河破霍邑拜金紫光祿大夫封扶風郡公邑二千戶
尋從劉文静擊屈突通于潼關通遣裨將桑顯和來逼
文静義軍不利琮與段志玄等力戰久之隋軍大潰通
遁走琮率輕騎追至稠桑獲通而反進兵東略下陝縣
拔太原倉拜右領軍大將軍賜物五百段

武士獲初為晉陽宮留守府司鎧參軍事義兵將起高

祖陰募勇敢士遣劉宏基長孫順德等分統之副留守
王威高君雅謂士彘曰宏基等皆從征三衛所犯不輕
吾欲禁身推覈士彘曰此並唐公客也若爾便太紛紜
威等繇是疑而不發高祖先令士彘密伏兵於宮城東
門外以防不虞留守司兵田德平知之方欲白王威等
士彘遽與德平論利害之機曰當分討捕之兵總隸唐
公城中募人皆劉晉陽之所統也高君雅等寄坐耳須
發即起彼何能為德平遂止及高祖舉義執王威君雅

等士獲以功授正護大夫大將軍府司錄參軍并賜物
等武德初勅宴元勳人等於含章殿賜酒作樂散金銀
錢頗羅等任取多少仍有詔與長孫順德等合恕一死
以彰元勳累遷工部尚書歷揚州都督賜實封八百戶
楊屯初仕隋為鷹揚郎將遇高祖討捕于太原屯領部
兵于麾下性謹直勇於攻戰高祖甚愛寵之遇起義以
為統軍從太宗擊西河平霍邑並功居最以佐命元勳
約免一死歷諸衛大將軍甚蒙遇任

長孫順德初仕隋為右勳衛避遼東之役逃匿于太原
深為高祖太宗所親委時羣盜並起郡縣各募兵為備
太宗外以討賊為名因令順德與劉宏基等召募旬日
之間衆至萬餘人結營於都下遂誅王威高君雅等義
兵起拜統軍從平霍邑破臨汾下絳郡俱有戰功尋與
劉文静擊屈突通於潼關每戰摧鋒及通將奔雒陽順
德追及桃林執通歸京師仍畧定陝縣高祖即位拜左
驍衛大將軍封薛國公

殷嶠初仕隋為大谷長義兵起召補大將軍府掾參預
謀畧授心腹之寄累以軍功拜光祿大夫從隱太子攻
剋西河太宗為渭北道元帥引為長史時關中羣盜往
徃聚結衆無適從令嶠招慰之所至皆下又與統軍劉
宏基率兵六萬屯長安故城隋將衛孝節自金光門出
戰嶠與宏基擊破之京城平賜爵陳郡公

段志玄父偃師隋末為太原郡書佐志玄從父在太原
甚為太宗所接待義兵起志玄募得千餘人授石頭大

都督府軍頭從平霍邑下絳郡攻永豐倉皆為先鋒歷
遷光祿大夫後遷鎮軍大將軍卒

馬元規安陸人也初以隊正從高祖征討因建義舉乃
仗節山南下浙南陽二郡及其屬縣得兵萬餘人

冊府元龜卷三百四十五